

7. oktober 2021

UKA2021/18

**Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarneranik Inatsisartut inatsisaat**

(Aningaasaqarnermut Nunamullu Namminermut Naalakkersuisoq)

Naalakkersuisut akileraaruserinermik ingerlatsineq pillugu Inatsisartut inatsisaata allanngortinneqarnissaannik inatsisissatut saqqummiussaannut Siumumit imaattumik oqaaseqassaagut.

Aallartilersinnanga oqaatigilara allaffissornikkut nunatsinni ingerlatsinerput oqaatitsinnillu atuinerput, kiisalu oqaatsitta allaffissornikkut pitsaasumik tunngavissikkumallugit naammattumik ineriartortinneqannginnerat, inuit sullinneqartut pisinnaatitaaffiinik innarliinertut isigigatsigit.

Inatsisit maani inersuarmi naqissuserlugit suliarisartakkavut kalaallisut allaqqaagaasanginnerisa malitsigaat atuisussanut paasineqarsinnaanngilluinnartumik ilaatigut allanneqarsimasarneri. Uanga nammineq naqitat suulluunniit kalaallisut allaqqasortaqaaraangata kalaallisoortaanik atuarnissara pingaartittarpara – Kalaallisut oqaatsivut oqaaseqqaaraakka allanneqarsimasullu tamakkiisumik paasisagukkit kalaallisoortaanik atuarnissara pissusissamisorpoq soorunami.

Qasserialinngeqaangali kalaallisut allanneqarsimasut arlaleriarlugit atuaraluarlugit suna pineqarnerisooq paasisinnaanngilluinnaraangakkit qallunaatoortaanut nuuinnartariaqartarnera.

Nunatta inatsisai tassaapput nunap inuisa qanoq ingerlanneqarnissaannut tunngasut – Sullinneqartullu ikinngeqaat inatsisit ataanni namminneq pineqartillutik tamakkiisumik inatsit qanoq paasisariaqarneranik nalornissuteqartut.

Aningaasanut inatsisissatut siunnersuut siullermeerneqarmat Siumumit oqariartuutitsinnut ilaavoq inatsisit pigisavut paasiuminarsarlugit suliarineqaqqittariaqartutut isigigatsigit.

Saqqummiussissut immikkoortumut pisatsinnut Naalakkersuisup saqqummiussaani kalaallisoortaa aamma taamaappoq – qasserialarlu atuaraluarpara sunali pineqarnerisooq paasisinnaannginnakku qallunaatoortaanut nuuppunga.

Paatsuuisoqaqqunagu naqissuserlara nutserisut suliai uani uparuarneqanngimmata nalunngilluinnarpara oqaatsit atorsinnaasatik tunngavigalugit sulinertik ingerlattaraat, uanili uparuarumasara unaaginnartoq tamatta soqutigisariaqaripput oqaatsitta allaffissornikkut ullumikkullu killiffigisatsinnut naapertuuttumik ineriartortittuarnissaat tamanna aningaasanik



naleqarpoq sullinneqartullu amerlanersai kalaallisut oqaasiliummata tamatta pingaartillugu oqaatsitta ineriartortittuarnissaat ataatsimoorfigisariaqarparput.

Naalakkersuisut inatsisip ullumikkut atukkatta allannguutissaattut saqqummiussaapaa paasilluarparput – Tassani pineqartut tassaammata meeqqanut imaluunniit inuit katissimasut avissaarneranit tunngaveqartumik akilersuisussaataitanermit tunngassuteqartuni paasissutissanik avitseqatigiissinnaaneq. Ullumikkut inatsit atugarput ilaqutariit avissaartariaqalerneranni illuatungeriit akornanni isumaqatigiinnginneq piutillugu paasissutissat inunnit pineqartunit tamakkiisumik tunniussinissaanut ersarissumik pisussaaffiliisimannginneq. Taamak inissisimasarneq anigorniarlugu inuillu pineqartut tassa katissimatisimallugu aapparisaq imaluunniit meeqqat akilersuisussaataitanerup iluani pineqartut sivisuumik utaqqisinneqartannginnissaat pineqarmat allannguutissat siunnersuutigineqartoq paasilluarlugu Siumut sinnerlugu aappasaaneerseqartinnagu Inatsisinut ataatsimiitsitaliamut ingerlateqqinneqassasoq innersuussutigaarput.

Vivian Motzfeldt, Siumut